



Broj:03-02-05-1-161/13

Sarajevo, 28.5.2013.

**KOLEGIJU PREDSTAVNIČKOG DOMA**  
**PARLAMENTARNE SKUPŠTINE BiH**  
**KOLEGIJU DOMA NARODA**  
**PARLAMENTARNE SKUPŠTINE BiH**  
**KOLEGIJU SEKRETARIJATA PS BiH**

**IZVJEŠTAJ**  
**O POSJETI DELEGACIJE PARLAMENTARNE SKUPŠTINE BiH**  
**KRALJEVINI SAUDIJSKOJ ARABIJI**

Delegacija Parlamentarne skupštine BiH u kojoj su bili: Božo Ljubić, predsjedavajući Predstavničkog doma PSBiH i predsjedavajući Grupe prijateljstva PSBiH za saradnju s Kraljevinom Saudijskom Arabijom, Denis Bećirović, prvi zamjenik predsjedavajućeg Predstavničkog doma PSBiH, Ognjen Tadić, prvi zamjenik predsjedavajućeg Doma naroda PSBiH, i Halid Genjac, delegat u Domu naroda PSBiH i zamjenik predsjedavajućeg Grupe prijateljstva PSBiH za saradnju sa KSA, boravila je od 10.5. do 14.5.2013. u bilateralnoj posjeti Kraljevini Saudijskoj Arabiji. Tokom posjete delegacija PSBiH sastala se sa: Abdullahom Al Sheikom, predsjedavajućim Konsultativnog vijeća KSA (Medžlis al Šura), princom Selmanom bin Abdulazizom Al Saudom, prestolonasljednikom, zamjenikom predsjedavajućeg Vijeća ministara i ministrom odbrane KSA, princom Mukrinom bin Abdulazizom Al Saudom, drugim zamjenikom predsjedavajućeg Vijeća ministara, savjetnikom i specijalnim izaslanikom kralja Abdullaha bin Abdulaziza Al Sauda, Abdullatifom bin Ahmed Al-Othmanom, guvernerom Javne uprave za investicije KSA, i Abdullahom Al Ahrabijem, predsjednikom Grupe prijateljstva za saradnju sa BiH u KSA.

**Sastanak s Abdullahom Al Sheikom, predsjedavajućim Konsultativnog vijeća KSA,**  
**Rijad 11.5.2013.**

Predsjedavajući Konsultativnog vijeća KSA (Medžlisu-l-Šura) sa saradnicima, prvim potpredsjednikom, pomoćnikom, šefom Grupe prijateljstva i nekoliko parlamentaraca, izrazio je dobrodošlicu predsjedavajućem Ljubiću i članovima parlamentarne delegacije Bosne i Hercegovine te naglasio potrebu češćih susreta delegacija s ciljem jačanja i unapređenja saradnje. Informirao je goste o načinu organiziranja i rada Konsultativnog vijeća KSA koje ima 150 članova od kojih je 30 žena, o tome da je ovaj parlament imenovanog a ne izbornog karaktera; da se određeni broj članova bira po odluci Konsultativnog vijeća KSA prema stručnosti kako bi bili u poziciji odgovoriti na mnoga stručna pitanja koja im se upućuju na razmatranje. Abdullah Al Sheik se posebno interesirao o situaciji u Bosni i Hercegovini, te koliko raznolikost naših naroda utiče na donošenje značajnih političkih odluka.

Predsjedavajući Predstavničkog doma PSBiH Božo Ljubić je, nakon iskazane zahvalnosti Kraljevini Saudijskoj Arabiji na velikoj pomoći narodima Bosne i Hercegovine, informirao domaćine o aktuelnoj situaciji u BiH, suživotu tri naroda i tri religije koji kao takvi mogu biti primjer mnogima u svijetu. Istakao da je BiH sigurna zemlja koliko i svaka druga evropska država te kazao da ulaskom Republike Hrvatske 1.7. 2013. u Evropsku uniju imamo povoljnije regionalno okruženje i najdužu granicu sa EU. U tom smislu informirao je članove Konsultativnog vijeća KSA o nastojanjima BiH za realizaciju evropskog puta i priključenje NATO-u. Gosp. Ljubić posebno se fokusirao i izrazio nadu da će aktivnosti na određenim sporazumima između BiH i KSA biti uskoro finalizirane i doprinijeti boljoj budućoj saradnji. Upoznao je domaćine s potencijalima kojima BiH raspolaže i pozvao

poslovne ljude iz KSA da investiraju u projekte u BiH, te da BiH, nakon perioda primanja pomoći, želi postati partner u poslovima od obostranog interesa.

Denis Bećirović je, također, izrazio zahvalnost za pomoć KSA BiH te posebno naglasio želju da se politička i ekonomska saradnja između naše dvije zemlje unapređuje čemu će svakako biti podsticaj i doprinijeti i posjeta delegacije PSBiH KSA. Domaćine je upoznao i s činjenicom da je i BiH u srednjem vijeku bila kraljevina, da su u BiH sublimirani i istok i zapad i da se oduvijek na našim prostorima živi zajedno.

Ognjen Tadić pozdravio je domaćine i istakao da dolazi iz srpskog naroda kao delegat iz Doma naroda PSBiH te zahvalio Kraljevini Saudijskoj Arabiji za pomoć bilo kome u BiH.

Halid Genjac izrazio je zadovoljstvo susretom parlamentarnih delegacija dvije zemlje na najvišem nivou te prenio osjećaj svih nas da smo došli prijateljima.

Abdulah Al Sheikh insistirao je na češćim sastancima predstavnika parlamenata KSA i BiH te preporučio i posebne sastanke predstavnika naših parlamentarnih grupa prijateljstva. Naglasio je da saudijski narod želi poboljšanje komunikacije sa BiH te u tom smislu dao podsticaj sastancima onih koji će dati konkretnu podršku ekonomskom razvoju, koji će doprinijeti i određenim rezultatima na osnovu konkretnih prijedloga i projekata.

Bh. parlamentarna delegacija zahvalila se i na podršci Kraljevine Saudijske Arabije za nestalno članstvo BiH u Vijeću sigurnosti UN-a.

**Sastanak s Njegovim veličanstvom princom Selmanom bin Abdulazizom  
Al Saudom, prestolonasljednikom KSA,  
Džeda, 12.5.2013.**

Susret parlamentarne delegacije s princom Selmanom protekao je u izuzetno srdačnoj i prijateljskoj atmosferi. Nakon tople dobrodošlice, prestolonasljednik Kraljevine Saudijske Arabije posebno je naglasio da njegove posjete Bosni i Hercegovini, Sarajevu i Mostaru, jedna zvanična a druga privatna, prema sopstvenoj želji, smatra najznačajnijim dijelovima svog života, da Bosnu i Hercegovinu osjeća duboko u svojoj duši. Posebno je izrazio zadovoljstvo posjetom delegacije Parlamentarne skupštine BiH, ali i svim drugim posjetama koje čine bh. zvaničnici KSA te zaželio češće surete i posjete običnih ljudi, biznismena i svih onih koji mogu doprinijeti daljem zbližavanju naših zemalja i naroda. Pokazao je interes za euroatlantski put BiH, položaj i saradnju BiH sa ostalim zemljama dijela Evrope u kojem se nalazi te naglasio i potrebu saradnje između velikih religija.

Prestolonasljednik KSA princ Selman istakao je da bi se i predstavnici naših vlada trebali sastajati radi ekonomskih pitanja. S tim u vezi posebno je naveo da ekonomski odnosi najbolje relaksiraju i reguliraju i političke odnose. Također, informirao je članove delegacije PSBiH da je KSA pokrenula i inicijativu za međureligijske kontakte i dijalog te da sve religije jedna drugu nadopunjuju.

Predsjedavajući Ljubić i vođa delegacije PSBiH se i ovom prilikom zahvalio saudijskom suverenu i narodu te zemlje na velikoj materijalnoj pomoći, podršci i uvijek izraženoj spremnosti za saradnju sa BiH i podizanje svih naših odnosa na viši nivo.

**Sastanak s Njegovim veličanstvom princom Mukrinom bin Abdulazizom  
Al Saudom, drugim zamjenikom predsjedavajućeg Vijeća ministara,  
savjetnikom i specijalnim izaslanikom kralja Abdullaha bin Abdulaziza Al Sauda,  
Džeda 12. 5. 2013..**

Princ Mukrin zaželio je delegaciji PSBiH toplu dobrodošlicu, uspješne razgovore sa svim saudijskim zvaničnicima te posebno naglasio potrebu većeg i efikasnijeg povezivanja na ekonomskom planu, s obzirom na odnos i tradicionalnu naklonjenost Kraljevine Saudijske Arabije Bosni i Hercegovini i svim njenim narodima. Preporučio je da se maksimalno iskoriste svi resursi s ciljem podizanja nivoa ekonomske saradnje i investicionih ulaganja KSA u BiH, za šta su potrebni konkretni projekti i prijedlozi bosanskohercegovačke strane. Izrazio je uvjerenje da će delegacije vlada i institucija zaduženih za ovu oblast također uskoro posjetiti KSA i sresti se sa saudijskim kolegama u vezi s tim.

Gosp. Ljubić se, u ime delegacije PSBiH, najiskrenije zahvalio princu Mukrinu na svim prijedlozima, ponudama ali i dosadašnjoj pomoći koja je iz KSA upućivana u BiH.

**Sastanak s Abdullatifom bin Ahmed Al-Othmanom,  
guvernerom Javne uprave za investicije KSA ( SAGIA),  
Rijad, 11.5.2013.**

Delegacija Parlamentarne skupštine BiH je u sjedištu najveće investicione kompanije Kraljevine Saudijske Arabije imala veoma konstruktivne razgovore, potkrijepljenje prezentacijom i davanjem na uvid djelatnosti SIGE u zemlji (KSA) i investicionim ulaganjima u inozemstvu. Guverner je izrazio nadu da će BiH i KSA naći odgovarajuće mogućnosti (projekte) za saradnju i u potpunosti dao podršku unapređenju ekonomskih odnosa između naše dvije zemlje.

**Sastanak s Abdullahom Al Ahrabijem, predsjednikom,  
i članovima Grupe prijateljstva za saradnju s BiH u Konsultativnom vijeću KSA,  
Rijad, 13.5.2013.**

Predsjedavajući i članovi Grupe prijateljstva Konsultativnog vijeća KSA istakli su da je posjeta delegacije Parlamentarne skupštine BiH Rijadu i Džedi dala podsticaj unapređenju međuparlamentarne saradnje, te izrazili nadu za daljnje unapređenje odnosa između naša dva parlamenta. Izrazili su spremnost i posebno naglasili značaj poboljšanja ekonomske saradnje, čemu i parlamentarne grupe prijateljstva mogu značajno doprinijeti. Također su konstatairali da ukupni ekonomski odnosi mogu biti i bolji i većeg obima. Iskazali su veliki interes za projekte, oblasti i mogućnosti kojima BiH raspolaže, u koje bi saudijski biznismeni mogli ulagati.

Božo Ljubić i članovi delegacije PSBiH su i ovom prilikom zahvalili na izvanrednom prijemu, toploj dobrodošlici i pozvali predsjedavajućeg i članove Grupe prijateljstva Parlamenta Kraljevine Saudijske Arabije da posjete BiH.

Sastanci u KSA organizirani su u Rijadu i Džedi.

Izvještaj napisala:  
Mirsada Bukaric-Kovačević

Izvještaj odobrio:  
dr. Božo Ljubić, predsjedavajući  
PDPSBiH i vođa delegacije